



Број/Број: 01,02-50-1-681-3/09
Сарајево/Sarajevo, 14.7.2009.

Z A P I S N I K

3. posebne zajedničke sjednice oba doma Parlamentarne skupštine BiH o temi: Delegati/poslanici pitaju – Vijeće ministara BiH odgovara, održane 14.7.2009., s početkom u 11 sati

Prisutni članovi Parlamentarne skupštine BiH: 33 poslanika iz Predstavničkog doma i 14 delegata iz Doma naroda.

Opravdano odsutni poslanici iz Predstavničkog doma: Sead Jamakosmanović, Mehmed Suljkanović, Sefer Halilović, Drago Kalabić, Željko Kuzmanović, Jovan Todorović, Savo Erić, Hadži Jovan Mitrović, Sadik Ahmetović.

Opravdano odsutni delegati iz Doma naroda: Mladen Ivanić.

Prisutni članovi Vijeća ministara BiH: Nikola Špirić, predsjedavajući Vijeća ministara BiH, Tarik Sadović, ministar sigurnosti BiH, Dragan Vrankić, ministar finansija i trezora BiH, Bariša Čolak, ministar pravde BiH, Sredoje Nović, ministar civilnih poslova BiH, Safet Halilović, ministar za ljudska prava i izbjeglice BiH, Selmo Cikotić, ministar odbrane BiH, Rudo Vidović, ministar komunikacija i prometa BiH, Mladen Zirojević, ministar vanjske trgovine i ekonomskih odnosa BiH, Marina Pendeš, zamjenik ministra odbrane BiH, Vilim Primorac, zamjenik ministra vanjske trgovine i ekonomskih odnosa BiH, Srđan Arnaut, zamjenik ministra pravde BiH, Slavko Marin, zamjenik ministra za ljudska prava i izbjeglice BiH, Mijo Krešić, zamjenik ministra sigurnosti BiH, Fuad Kasumović, zamjenik ministra finansija i trezora BiH i Mladen Simić, zamjenik ministra komunikacija i prometa BiH.

Ostali prisutni: predstavnici međunarodnih organizacija, i to: OHR-a, OSCE-a, EUPM-a, EUFOR-a, EUSR-a, kao i nevladinih organizacija NDI-a i Centri civilnih inicijativa.

Sjednicu je otvorio i njome predsjedavao Ilija Filipović, predsjedavajući Doma naroda Parlamentarne skupštine BiH.

U uvodnim napomenama Ilija Filipović podjestio je prisutne da je, u skladu s članom 148. Poslovnika Doma naroda i članom 157. Poslovnika Predstavničkog doma, Zajednički kolegij oba doma Parlamentarne skupštine BiH sazvaо 3. posebnu zajedničku sjednicu oba doma Parlamentarne skupštine BiH o temi: Delegati/poslanici pitaju – Vijeće ministara BiH odgovara. U skladu s poslovnicama oba doma Parlamentarne skupštine BiH, sjednica je sazvana 30 dana ranije, a Zajednički kolegij oba doma Parlamentarne skupštine BiH utvrdio je sljedeći

DNEVNI RED

1. Usvajanje Zapisnika 2. posebne zajedničke sjednice oba doma Parlamentarne skupštine BiH o temi: "Poslanici/delegati pitaju - Vijeće ministara BiH odgovara";
2. Pitanja delegata/poslanika – odgovori Vijeća ministara BiH.

Ad.1. Usvajanje Zapisnika 2. posebne zajedničke sjednice oba doma Parlamentarne skupštine BiH o temi: "Poslanici/delegati pitaju - Vijeće ministara BiH odgovara"

Primjedbi na zapisnik nije bilo.

Parlamentarna skupština BiH usvojila je Zapisnik 2. posebne zajedničke sjednice oba doma Parlamentarne skupštine BiH o temi: "Poslanici/delegati pitaju - Vijeće ministara BiH odgovara", a rezultati glasanja bili su sljedeći:

Predstavnički dom

"za"	26	18 FBiH	8 RS
"protiv"	0		
"suzdržan"	2		

Dom naroda

"za"	14	10 FBiH	4 RS
"protiv"	0		

Ad.2. Pitanja delegata/poslanika – odgovori Vijeća ministara BiH

U uvodnom izlaganju o ovoj tački dnevnog reda Ilija Filipović podsjetio je prisutne da, u skladu s članom 148. stav (3) Poslovnika Doma naroda i članom 157. stav (3) Poslovnika Predstavničkog doma, poslanik i delegat imaju pravo postaviti jedno pitanje u vremenu do tri minute i korekciju citata (repliku) na odgovore u istom trajanju. Postavljeno pitanje dostavlja se Vijeću ministara BiH najmanje sedam dana prije održavanja sjednice, i sva pitanja koja su blagovremeno dostavljena proslijeđena su Vijeću ministara BiH.

Istakao je da je članom 149. poslovnika Doma naroda detaljno propisana procedura na samoj sjednici, te je nakon citiranja navedene odredbe konstatirao da će se rasprava na sjednici odvijati u skladu s njom.

Ilija Filipović konstatirao je da su pitanja za drugu posebnu sjednicu dostavili:

Iz Doma naroda sljedeći delegati:

1. Hazim Rančić
2. Slobodan Šaraba
3. Zoran Koprivica i
4. Adem Ibrahimpašić.

Iz Predstavničkog doma sljedeći poslanici:

1. Vinko Zorić
2. Rifat Dolić
3. Jerko Ivanković-Lijanović
4. mr. Denis Bećirović
5. mr. Husein Nanić

6. Sadik Bahtić
7. mr. Mirko Okolić
8. mr. Jozo Križanović
9. dr. Lazar Prodanović
10. mr. Remzija Kadrić
11. dr. Milorad Živković
12. Slavko Jovičić
13. dr. Halid Genjac
14. dr. Zlatko Lagumdžija
15. Bakir Izetbegović
16. Martin Raguž
17. dr. Azra Alajbegović,
18. dr. Branko Dokić
19. Velimir Jukić i
20. Šemsudin Mehmedović.

Na kraju uvodnog izlaganja o ovoj tački dnevnog reda, Ilija Filipović podsjetio je da će delegati i poslanici pitanja izlagati redoslijedom kojim su pristizala.

Delegat Hazim Rančić postavio je Vijeću ministara BiH sljedeće pitanje:

- a) Koliko godišnje BiH izgubi novca zbog toga što ne kontrolira vazdušni saobraćaj iznad BiH?
- b) Koliko je ukupno novca izgubila BiH od 1996. do 2009. godine zbog toga što ne kontrolira vazdušni saobraćaj iznad BiH?
- c) Kada će BiH preuzeti kontrolu vazdušnog saobraćaja iznad BiH a što proizilazi iz suvereniteta BiH kao i člana 1. Konvencije o međunarodnom civilnom vazduhoplovstvu?"

Odgovor na postavljeno pitanje dao je Rudo Vidović, ministar komunikacija i prometa BiH.

Hazim Rančić, u svom komentaru na odgovor, istakao je da istim nije zadovoljan, te je zatražio dodatno pojašnjenje.

Rudo Vidović dao je traženo pojašnjenje.

Poslanik Vinko Zorić postavio je Vijeću ministara BiH sljedeće pitanje:

"Šta čine institucije BiH s ciljem rasvjetljavanja zločina u i nakon 1945. godine koje su počinili partizani i komunisti, s posebnim naglaskom na identifikaciju žrtava ali i zločinaca u nedavno pronađenim masovnim grobnicama u Vrgorcu i slovenskom rudniku Barbarin - rov kod sela Huda Jama, u blizini Laškog?"

Odgovor na postavljeno pitanje dao je Bariša Čolak, ministar pravde BiH.

Delegat Slobodan Šaraba postavio je Vijeću ministara BiH sljedeće pitanje:

"Da li će i kada Vijeće ministara konačno uputiti u parlamentarnu proceduru Zakon o denacionalizaciji/restituciji?"

Odgovor na postavljeno pitanje dao je Bariša Čolak, ministar pravde BiH.

Slobodan Šaraba istakao je da nije zadovoljan odgovorom.

Poslanik Rifat Dolić postavio je predsjedavajućem Vijeća ministara BiH sljedeće pitanje:

"U kojoj mjeri i na koji način je u radu Vijeća ministara BiH i drugih institucija BiH, entiteta i kantona prisutan problem neuravnoteženog regionalnog razvoja BiH, šta je uzrok stalno rastućim razlikama u regionalnom razvoju BiH i šta Vijeće ministara BiH u narednom periodu namjerava poduzimati da se razlike u regionalnom razvoju smanjuju, s obzirom da je to i jedan od strateških ciljeva EU?"

Odgovor na postavljeno pitanje dao je Nikola Špirić, predsjedavajući Vijeća ministara BiH.

Rifat Dolić istakao je da je djelimično zadovoljan dobivenim odgovorom.

Delegat Zoran Koprivica postavio je Vijeću ministara BiH i ministru sigurnosti BiH sljedeće pitanje:

"Zakonom o izmjenama i dopunama Zakona o zaštiti tajnih podataka BiH („Službeni glasnik“ br. 12/09) u članovima od 14. do 21. predviđen je postupak vršenja sigurnosnih provjera i izdavanje dozvole licima za pristup tajnim podacima u skladu s odredbama tog zakona. U slučaju odbijanja dozvole za pristup tajnim podacima, dozvoljena je žalba nezadovoljnom licu komisiji koju će imenovati Savjet ministara BiH koja je predviđena u članu 21. Zakona o izmjenama i dopunama Zakona o zaštiti tajnih podataka. Spomenuta komisija određuje se kao nadležna u drugostepenom postupku kao drugostepeni organ za rješavanje žalbi u upravnom postupku po zahtjevima za dobijanje sigurnosnih dozvola za pristup tajnim podacima.

Moje pitanje Vijeću ministara BiH, odnosno Ministarstvu sigurnosti BiH glasi – Da li je i kada je formirana ova komisija, te ukoliko nije, šta je urađeno u vezi s njenim formiranjem?"

Odgovor na postavljeno pitanje dao je Tarik Sadović, ministar sigurnosti BiH.

Poslanik Jerko Ivanković Lijanović postavio je predsjedavajućem Vijeća ministara BiH sljedeće pitanje:

"Zašto Vijeće ministara BiH ne provodi zaštitne mjere utvrđene Sporazumom CEFTA, odnosno zašto Vijeće ministara time krši Sporazum CEFTA?"

Odgovor na postavljeno pitanje dao je Mladen Zirojević, ministar vanjske trgovine i ekonomskih odnosa BiH.

Delegat Adem Ibrahimpašić postavio je Vijeću ministara BiH sljedeće pitanje:

"Kada će Vijeće ministara potpisati Sporazum o međusobnom priznavanju certifikata o kvalitetu proizvoda sa zemljama potpisnicama CEFTA-e. I u okviru tog pitanja – Da li će

Vijeće ministara osigurati ili participirati u sredstvima za osposobljavanje laboratorija kako bi oni mogli izdavati valjane certifikate o kvalitetu proizvoda?"

Odgovor na postavljeno pitanje dao je Mladen Zirojević, ministar vanjske trgovine i ekonomskih odnosa BiH.

Poslanik mr. Denis Bećirović postavio je predsjedavajućem Vijeća ministara BiH sljedeće pitanje:

"Koji su konkretni razlozi zašto Vijeće ministara BiH, u ovom mandatu, nije realiziralo više od 150 zaključaka i inicijativa koje je Predstavnički dom Parlamentarne skupštine BiH usvojio, kao i zašto je izrazito nizak stepen godišnje realizacije planiranih zakona Vijeća ministara BiH, a podsjećam, u 2007. godini nije realizirano više od 2/3 planiranih zakona Vijeća ministara BiH, dok u 2008. godini nije realizirano više od polovine zakona koji su bili planirani godišnjim programom rada Vijeća ministara BiH?"

Odgovor na postavljeno pitanje dao je Nikola Špirić, predsjedavajući Vijeća ministara BiH.

Mr. Denis Bećirović istakao je da nije zadovoljan dobivenim odgovorom.

Poslanik mr. Husein Nanić postavio je predsjedavajućem Vijeća ministara BiH sljedeće pitanje:

"Članom 20. Zakona o nestalim licima ("Službeni glasnik BiH", broj 50/04) definirano je obilježavanje mjesta ukopa i iskopavanje nestalih lica. Između ostalog se definira da se na zahtjev porodice nestalog lica ili udruženja može zatražiti obilježavanje mjesta ukopa nakon što nadležni organ za traženje nestalih lica izda uvjerenje da je na predloženom lokalitetu izvršeno iskopavanje tijela ili da je postojala grobnica, te nakon što nadležni organ izda odgovarajuću dozvolu. Također je utvrđeno da se finansiranje i izgled obilježja regulira Pravilnikom o obilježavanju mjesta ukopa i iskopavanja nestalih lica koje je trebalo pripremiti Ministarstvo za ljudska prava i izbjeglice i dostaviti Vijeću ministara BiH na usvajanje.

Na osnovu prethodnog, postavljam pitanje – Koliko je do sada zatraženo, ali i koliko izdato rješenja o obilježavanju mjesta ukopa ili iskopavanja, koliko je sredstava utrošeno i na koji način se te aktivnosti finansiraju? U vezi s tim postavljam i pitanje – Da li će Vijeće ministara izraditi i u parlamentarnu proceduru uputiti Zakon o masovnim grobnicama u BiH?"

Odgovor na postavljeno pitanje dao je Safet Halilović, ministar za ljudska prava i izbjeglice BiH.

Mr. Husein Nanić zatražio je da mu se odgovor dostavi u pisanoj formi.

Poslanik Sadik Bahtić postavio je ministru komunikacija i prometa BiH sljedeće pitanje:

"Šta Ministarstvo planira uraditi na prometnom uvezivanju Unsko-sanskog kantona sa ostalim dijelovima BiH, državama u okruženju i EU u kontekstu realizacije Projekta Koridor Vc?"

Odgovor na postavljeno pitanje dao je Rudo Vidović, ministar komunikacija i prometa BiH.

Poslanik mr. Mirko Okolić postavio je predsjedavajućem Vijeća ministara BiH sljedeće pitanje:

- "1. Zašto Vijeće ministara BiH nije izvršilo svoje zakonom propisane obaveze, odnosno kada će Vijeće ministara BiH početi da na vrijeme dostavlja Platformu o obavještajno-sigurnosnoj politici Predsjedništvu BiH na odobrenje, a Parlamentarnoj skupštini BiH na usvajanje?"
2. Kada će predsjedavajući Vijeća ministara BiH podnijeti Predsjedništvu BiH i Parlamentarnoj skupštini BiH koncizni godišnji izvještaj o aktivnostima Obavještajno-sigurnosne agencije, što uključuje i podatke o svim potpisanim međunarodnim sporazumima?"

Odgovor na postavljeno pitanje dao je Nikola Špirić, predsjedavajući Vijeća ministara BiH.

Poslanik mr. Jozo Križanović postavio je Vijeću ministara BiH sljedeće pitanje:

"Kome je do sada izvršen povrat imovine, kojim pojedincima i kojim institucijama? Kakva je struktura te imovine? Kolika je njena vrijednost i na osnovu kojih propisa je to rađeno? Šta su za Vijeće ministara stvarni problemi za donošenje zakona o restituciji i namjerava li konkretno Vijeće ministara u ovoj godini ponuditi Prijedlog zakona o restituciji?"

Odgovor na postavljeno pitanje dao je Bariša Čolak, ministar pravde BiH.

Mr. Jozo Križanović istakao je da nije zadovoljan dobivenim odgovorom

Poslanik Lazar Prodanović postavio je ministru pravde BiH sljedeće pitanje:

"Da li će se u skorije vrijeme pristupiti usklađivanju Pravilnika o polaganju javnih/stručnih ispita koji se donose na entitetskom i državnom nivou?"

Odgovor na postavljeno pitanje dao je Bariša Čolak, ministar pravde BiH.

Poslanik mr. Remzija Kadrić postavio je Vijeću ministara BiH sljedeće pitanje:

"Koje sve aktivnosti Vijeće ministara BiH preduzima na sprovođenju Sporazuma o pitanjima sukcesije?"

Odgovor na postavljeno pitanje dao je Dragan Vrankić, ministar finansija i trezora BiH.

Poslanik dr. Milorad Živković postavio je predsjedavajućem Vijeća ministara BiH sljedeće pitanje:

"U jeku globalne ekonomske krize, Savjet ministara BiH pokušao je svojim mjerama u BiH napraviti određene uštede, pogotovo u svjetlu Sporazuma s MMF-om, i čini mi se da jedna od mjera, koja je ujedno bila i najveća po obimu, ali istovremeno i najnepopularnija i

najjednostavnija, bilo smanjenje plaća zaposlenih u institucijama BiH, pri čemu se krenulo u rješavanje tog problema linearnim pristupom, gdje su praktično najviše osjetili oni koji imaju najmanje plaće.

Istovremeno ja smatram da je bilo moguće boljim upravljanjem materijalno-tehničkih resursa dodatno uštedjeti novac, a najviše u tome je prednjačio zakup prostora za smještaj zajedničkih institucija, i to je jedan od velikih, po meni, neiskorištenih resursa. Svjedoci ste da svaki put kada usvajamo budžet praktično donosimo zaključke da treba riješiti stalni smještaj institucija, zajedničkih institucija BiH. Samo trenutno imamo preko 48.000 m² zakupljenih, u privatnom vlasništvu, prostora koji na godišnjem nivou nose preko 7,5 miliona KM.

Mene zanima da li je ove godine napravljen makar plan za smještaj tih institucija u narednom periodu, shvatajući da se radi o dugoročnom poslu, o strateškom potezu koji bi, sa svoje strane, donio velike uštede?"

Odgovor na postavljeno pitanje dao je Dragan Vrankić, ministar finansija i trezora BiH.

Poslanik Slavko Jovičić postavio je Vijeću ministara BiH sljedeće pitanje:

"Trećeg novembra 2008. godine, na moju inicijativu, Predstavnički dom je donio zaključak da se održi zajednička sjednica oba doma Parlamentarne skupštine BiH s jednom tačkom dnevnog reda: "Svjetska ekonomska kriza i globalna recesija koja je počela potresati najrazvijenije zemlje svijeta". Tada sam rekao, a danas evo ponavljam, i znam kakve reperkusije ta kriza ima na privredni i ekonomski sistem BiH, i tada sam tražio da sve institucije BiH, razne agencije, Privredna komora BiH, instituti, stručnjaci, zajedno sa entitetskim vladama i skupštinama, pripremi mjere za ublažavanje krize kako BiH ne bi doživjela privredni i ekonomski kolaps i slom.

Tu inicijativu sam ponovo obnovio u pisanoj formi 11. novembra, a nakon toga sam na sjednici Zajedničke komisije za ekonomske reforme i razvoj dobio apsolutnu podršku da se ta sjednica održi. Od tada je prošlo, evo, već osam mjeseci a da još ne samo da nismo održali zajedničku sjednicu nego nismo imali tu tačku ni na sjednici Predstavničkog doma Parlamenta.

Pitanje glasi – Ima li Savjet ministara pripremljene mjere o kojima sam već rekao u uvodu? U međuvremenu sam, prije izvjesnog vremena, u štampi pročitao da se za sličnu inicijativu zalaže i Fiskalno vijeće BiH. Pa prije 10-ak dana saznao sam također da je Klub poslanika Stranke za BiH pokrenuo inicijativu da se raspravlja o ekonomskim pitanjima koja su vezana za manji priliv u budžetu opština, kantona, entiteta i svih institucija BiH itd.

Dakle, kada će Savjet ministara BiH, da li na zajedničkoj sjednici oba doma ili na sjednici Predstavničkog doma, izaći s cjelovitim mjerama ublažavanja ove ekonomske krize, s obzirom da smo svjesni da svakodnevno ostaje na stotine radnika bez posla, te da, to ne treba posebno naglašavati, BiH prijete socijalni nemiri zbog ogromnog broja nezadovoljnih ljudi koji jedva još biološki preživljavaju."

Odgovor na postavljeno pitanje dao je Dragan Vrankić, ministar finansija i trezora BiH.

Poslanik Halid Genjac postavio je Vijeću ministara BiH sljedeće pitanje:

"Da li su državni koordinator za IPA-u i Koordinacioni odbor za IPA-u prilikom formiranja indikativne liste projektnih ideja koje će se u 2009. godini finansirati iz sredstava IPA-e - komponente I, vodili računa o adekvatnoj raspodjeli sredstava po entitetima? Kako bi izgledala raspodjela sredstava po entitetima ukoliko Komitet IPA-e usvoji indikativnu listu projektnih ideja?"

Odgovor na postavljeno pitanje dao je Dragan Vrankić, ministar finansija i trezora BiH.

Poslanik dr. Zlako Lagumdžija postavio je predsjedavajućem Vijeća ministara BiH sljedeće pitanje:

"U svom inauguracionom govoru, 11. januara 2007., definirali ste svoje političke prioritete koji proizilaze iz političkog dogovora sedam političkih partija, potpisanog 3. januara 2007. godine. Vi ste tu definirali relevantne programske ciljeve, njih četrnaest. Prvi je bio članstvo u NATO-u, treći je bio provođenje Dejtonskog ugovora, Aneksa X, posebna transformacija OHR-a, i u tom svjetlu ste vidjeli i donošenje ustavnih rješenja kao prioritet Vašeg Vijeća ministara.

Zašto Vijeće ministara nije ispunilo ovaj cilj i koje konkretne korake mislite poduzeti da se on ostvari ove godine, odnosno kako, s kim i kada mislite dograditi, kako ste i sami rekli, okosnicu priče o reformi Ustava – Aprilski paket? Šta se učinili i šta planirate učiniti da Vašington i Brisel budu od pomoći u tom procesu, a ne da ih se tjera, kao što se može steći dojam iz dijela vladajuće koalicije?"

Odgovor na postavljeno pitanje dao je Nikola Špirić, predsjedavajući Vijeća ministara BiH.

Poslanik Bakir Izetbegović postavio je Vijeću ministara BiH sljedeće pitanje:

"Povodom usvajanja Prijedloga zakona o Budžetu institucija BiH i međunarodnih obaveza BiH za 2009. godinu, Predstavnički dom Parlamentarne skupštine BiH je na 44. sjednici, održanoj 21. januara ove godine, usvojio sljedeće zaključke:

1. Zadužuje se Vijeće ministara da pokrene aktivnosti za pronalaženje povoljnog kredita ili za izdavanje obveznica za potrebe finansiranja povratka izbjeglih i raseljenih lica, shodno Programu povratka od 2009. do 2014. godine i
2. Zadužuje se Vijeće ministara BiH da najmanje dva puta godišnje izvijesti Predstavnički dom Parlamentarne skupštine BiH o realizaciji sredstava predviđenih za povratak.

Moje pitanje glasi – Koje aktivnosti je Vijeće ministara pokrenulo kako bi se iznašao povoljan kredit u skladu sa zaključkom broj 1 i kada procjenjujete da će sredstva biti operativna?

Odgovor na postavljeno pitanje dao je Dragan Vrankić, ministar finansija i trezora BiH.

Poslanik Martin Raguž postavio je ministru komunikacija i prometa BiH sljedeće pitanje:

"Kakva je sad ocjena ministra o izgradnji Koridora Vc i to po najvažnijim segmentima:

1. kad je u pitanju dokumentacija,
2. kad su u pitanju prioritetne dionice, mi znamo koje su to dionice, sjeverna, srednja i južna, kakva je situacija s finansijskom podlogom i sredstvima, da li su ta sredstva osigurana za početak izgradnje kad se završi izvedbena projektna dokumentacija,
3. kakav je, po njegovoj ocjeni, ukupan ambijent za izgradnju ovog najvećeg infrastrukturnog projekta, ne samo u BiH nego u čitavom regionu
4. postoje li opstrukcije u jednoj takvoj vrsti prioriteta i, ako postoje, koje su to?"

Odgovor na postavljeno pitanje dao je Rudo Vidović, ministar komunikacija i prometa BiH.

Poslanik dr. Azra Alajbegović postavila je Vijeću ministara BiH sljedeće pitanje:

"Kakvo je dato mišljenje na Prijedlog akcionog plana za provođenje međunarodnih obaveza BiH u oblasti sigurnosti, upućeno Vijeću ministara 14.05.2007. godine, broj 07/03-04-1026-6/07?"

Odgovor na postavljeno pitanje dao je Tarik Sadović, ministar sigurnosti BiH.

Poslanik dr. Branko Dokić postavio je ministru vanjskih poslova BiH sljedeće pitanje:

"Zbog čega se pooštravaju kriteriji za izdavanje viza građanima BiH?"

S obzirom da sjednici nije prisutvovao ministar vanjskih poslova BiH, kojem je pitanje i upućeno, konstatirano je da će mu ono biti proslijeđeno, kako bi odgovor naknadno bio dostavljen.

Poslanik Velimir Jukić postavio je Vijeću ministara BiH i Konkurencijskom vijeću BiH sljedeće pitanje:

"Da li na marketinškom tržištu elektronskih medija ima pojava prevelike koncentracije tržišnog udjela, što omogućava monopolsko ponašanje, odnosno zabranjeno konkurencijsko djelovanje nekih marketinških agencija?"

Odgovor na postavljeno pitanje dao je Rudo Vidović, ministar komunikacija i prometa BiH.

Poslanik Šemsudin Mehmedović postavio je Vijeću ministara BiH sljedeće pitanje:

"Bosna i Hercegovina kao jedna od šest republika bivše Jugoslavije ima nekoliko neriješenih pitanja sa susjednim državama. A jedno od njih je i pitanje zajedničkih resursa u elektroenergetskoj oblasti i hidropotencijalima. Tako danas susjedna Crna Gora polaže pravo

na korištenje dijela hidropotencijala Trebinjskog jezera. Najveća vještačka akumulacija u ovom dijelu Evrope, Buško jezero, iako se nalazi unutar granica BiH, u stvarnosti pripada Republici Hrvatskoj. Zatim neriješeni odnosi sa Srbijom zbog hidroelektrana na Drini itd.

Postavljam pitanje Vijeću ministara – Kada će započeti proces reguliranja međudržavnih odnosa u elektro i hidrosektoru sa susjednim nam državama, kao i kako misle riješiti zaostale obaveze susjeda prema BiH zbog korištenja resursa bez saglasnosti države BiH?"

Odgovor na postavljeno pitanje dao je Mladen Zirojević, ministar vanjske trgovine i ekonomskih odnosa BiH.

Sjednica je završena u 14,35 sati.

Sastavni dio ovog zapisnika je transkript 3. posebne sjednice o temi: Poslanici/delegati pitaju – Vijeće ministara BiH odgovara.

Sekretar
Doma naroda
Marin Vukoja

Predsjedavajući
Doma naroda
Ilija Filipović, dip.iur.